

SERVISC DE FURMAZION - PROIET 2020

"La Ferata - danter dauni y passà"

La Ferata



Nce per chëst ann ie l servisc de furmazion stat bon de mèter mpe n proiet a nivel de valeda. Davia che l ie avisa 60 ani cà da canche l'ultima ferata suflava tres Gherdëina à i representanc dla lies, che fej pert dl cunsèi de furmazion, abù l'idea de dediché l argumënt propi a chësta ntraunida. **"La Ferata - danter passà y dauni"**.

Lies de duta la valeda fova nviedes a se fé n pensier cie proposta furmativa che les pudëssa mèter a ji y l se à inò n iede desmustrà che nosta lies cun si cumèmbri à truepa criatività, fantasia y ueia de fé. Nscila iel uni metù adum n program drët nteressant cun truepa manifestazions che va dal referat ala mostra, dal teater a formes nueves nteratives, da letelatura a film y ancuntesdes.

L program

La manifestazions unirà pitedes pian via cun l mēns de auril y jirà inant feter nchin ala fin dl ann. Dajonsti sēn n mumēt na udleda ala singula manifestazions.

La lingia de manifestazions meterà man cun n Forum Sëlva (mëisa turonda) ulache l unirà jīt

ite sun l argumēt **"Trafich y mublità te Gherdëina - ciunes ie pa la soluzions?"**; tlo saral rapresentanc dla politica y dl turism sciche nce esperc de mublità che dijerà si minonga sun l dau-

ni dla mublità te Gherdëina. Cater prima tlasses dla Scola Mesana de Urtijëi fova unides nviedes a se fé n pensier sun ciuna soluzions che i sculeies vëija per regulé **l trafich tres nosta valeda**. Èi pudova dessenië o fé vel model y dut cant unirà mustrà te na mostra te bibliotech "San Durich" a Urtijëi. Ai 29 de mei iel avisa 60 ani cà che la ferata ova fat si ultim viac tres Gherdëina; te chësta ucasion vëniel metù a ji te Plan

- luegia ulache l fova la stazion - na **fe-sta de iubileum**. Te chësc cuntest uniral nce mustrà la cialjota (stazion) che ie unida realisesda sun l model da dant. **"Ie me lecorde"** ie n film che documentea la testimonianzes de jënt de Gherdëina coche èi à vivù la ferata. L Cunsèi de Furmazion de S. Cristina se à cruzià de urganisé chësc proiet che mèt a lum lecurdanzes, mprescions y l nchersciadum per nosta ferata. Ntan l'instà puderan udëi, te "Tublà da Nives"

l pez de teater **"Die Lokomotive des Glücks"** cun

Carlo Emanuel Esposito; cun pec musichei, ntraunides da ri y che dà da pensé do uniral dat vita ai tēmps de gloria de nosta ferata. De setēمبر puderan ji a ti cialé al **Brenner Basistunnel (BBT)** y l'autora Rut Bernardi purterà dant stories crimineles y sassinedes fetres tla ferata. Ncont de mèter a ji na ferata te Gherdëina iel stat deplù proietanc che se à fat n pensier; èi prejenterà si lēures de utober te Tublà da Nives. Marco Danzi unirà sun nvit dla Lia Cultura y Usanzes a Urtijëi per rujené sun **"Ideen und Alternativen zur Lösung des Verkehrs im Grödnertal: Neue Infrastruktur oder Verkehrsberuhigung?"**. Y per finé via l proiet possen se ncunferté sun la bela **scultures tla nēif** che unirà realisesdes de dezēمبر y che arà sciche tema **"La ferata de Gherdëina"**.

Mplu saral mo doi manifestazions o prupostes drët inu-vatives. **"La ferata passa tres S. Cristina"** ie na **spaziereda nterativa** ulache - cun l aiut de la app "Actionbound" ti jiràn do ala piedies dla ferata de Gherdëina tres l luech

de S. Cristina se devertian y ruvan sēura sun ntraunides y stories nteressantes. La raides cumpaniedes che unirà metudes a ji sarà ai 2 y ai 23 de juni y ai 4 y 25 de agost.

Savëis'a ciche ie n **"Escape Room"**? Bon pona: l se trata de fé na sperienza dldut nueva y nce unica. N valguna persones vën "dsaredes" ite te n local y viv - per n'ëura alalongia - la sperienza de vester saudeies rusc che messova fé su la ferata de Gherdëina ntan la Prima Viera Mundiela. N muessa abinë duc i ndizies per pudëi inò uni ora de chësc local. Nteressei possa nce cialé sun la plata internet www.escape-valgardena.com y nresci velch deplù. Chësta ultima doi manifestazions unirà metudes a ji dala lia **"Trix"**.

L proiet vën susteni dai chemuns de Gherdëina y mo da d'otra istituzions y unirà retlamisà man man ti media de Gherdëina, cun stampac y sambën nce sun i social media.

NB: Pervia dla Emergenza de Coronavirus ne n'iel mo nia segur sce duta la manifestazions y mostres possa uni metudes a ji.

Nfurmazions plu vën mo fates al savëi.



La ferata ruva tala stazion da Nives.
Fotografia ora dl archif de Walter Planinschek